

Minzczuz Doxgiet Ndei

□ Liengz Fuyungz / 梁富容

Bouxcuengh Swcigh,
Daengz ngoenzneix,
Mbouj dwg nuengx couh beix,
Minzczuz doxgiet ndei,
Van fouzbeij,
Lumj feiz raeuj doxdoengz.

Minzczuz doxgiet ndei,
Lumj seizcin,
Va caeuq ngeiq caez mwn,
Haj roek duj cienz hoengz,
Cungj doxdoengz,
Baengh daengngoenz ndaej maj.

Doenghbaez raeuz caezgya,
Youq gwnz bya,
Goemq rum haz guh vax,
Moix mbat roengz fwnraq,
Rumz hung gvaq,
Gwnz mbin laj ciengx bya.

Dangj hwnj guh fuzbinz,
Raeuj aensim,
Hawj ngaenz guh laeuz moq,
Bouxlaux caeuq bouxcoz,
Caez ciuqgoq,
Ndwenggoenz guh ndaej hwnj.

Ranzlaeuz ronghdangdang,
Hwnj rim mbanj,
Lai sang gvaq fwjndaem,
Ndaundeiq youq gwnzmbwn,
Daj gyae raen,
Daengz haemh aeu daeng yawj.

Doenghbaez ndaw mbanj gou,
Youq ndaw bya,
Hai dou byacapcap,
Langh bae haw saek mbat,
Caen fouzfap,
Daemx dat youh bungq oen.

Gungcanjdangj caen guh,
Hawj bouxhoj,
Guh loh daengz bakdou,
Diuzdiuz gvangq youh soh,
Ronghyouyou,
Doeng seiq fueng bet bailh.

Minzczuz doxgiet ndei,
Daengz seizneix,
Beij feiz lij lai raeuj,

Gwn daenj mbouj aeu you,
Saedceij raeuz,
Beij laeuj lij lai rang.

Minzczuz doxgiet ndei,
Caez ciuqgoq,
Miz laeuj noh caez gwn,
Doxgiet it diuz sim,
Bengz lumj gim,
Fwngz camx rin hix byoengq.

Doenghbaez raeuz minzczuz,
Caen gungzhoj,
Byaij loh lau raen vunz,
Seizneix raeuz miz gwn,
Angq hwnj mbwn,
Sing riu lumj byajraez.

Raeuz siujsoq minzczuz,
Vunzvunz rox,
Swnghoh ndaej daezsang,
Lumj bakmbanj gorangz,
Gogo cangq,
Hoh lai sang gvaq hoh.

Minzczuz doxgiet ndei,
Ndei fouzbeij,
Bibi meiz(miz) cinbu,
Guhhong mbouj byaij loh,
Naengh mohdoz,
Soh hai daengz henz naz.

Seizneix youq ranz mbwq,
Ok bakdou,
Bouxboux ndaej naengh ci,
Langh siengj naengh feihgih,
Hix yungzheih,
Mbouj lau mbouj meiz(miz) cienz.

Daxbuz caeuq daxgoeng,
Caen vuenyungz,
Mbouj haeuj ndoeng dwk danq,
Diuqfoux ma daengz ranz,
Riengz lwglan,
Naengh ranzding guh ' angq.

Minzczuz doxgiet ndei,
Bi beij bei(bi),
Doxcaux meiz(miz) cinbu,
Batgak ndaem gwnz fwj,
Rangfwfw,
Mbin doh daengz lajmbwn.

Minzczuz caez doengzsim,
Youq geh rin,
Ndaem rim golwgfog,
Gai bae daengz guek rog,
Seiz caen hob,
Ngaenz baenz rop dawz ma.

Gwnz bya ndaem lwgmak,
Youq bangxdad,
Ciengx rwi gag miz lai,
Mboujlwnh mbwk naeuz sai,
Gaenx lumj rwi,
Ndwenggoenz diemz gvaq dangz.

Minzczuz caez doxgap,
Miz banhfap,
Cauxmoq gag miz lai,
Ciengx vaiz yiengz bae gai,
Ndaej ngaenz lai,
Ciengx cwz vaiz gai cij.

Dangj minzczuz cwngcwz,
Hawj bouxhoj,
Hai diuz loh ndaej gim,
Doxgiet caemh aensim,
Ndongj gvaq rin,
Cij dwg aen dijbauj.

Hajcib roek minzczuz,
Va hai duj,
Dujduj hai lwenqda,

Caez caeuq ngeiq caemh nga,
Youq baihlaj,
Gyazgyaz caez caemh rag.

Rag cap youq ndawnamh,
Daemq naeuz sang,
Namh dwg namh guekgya,
Baengh dangj baengh guekgya,
Dujduj va,
Gyaz beij gyaz hoengzmoq.

Gwn raemx mbouj lumz mboq,
Laux caeuq coz,
Byaij loh mbouj lumz haiz,
Doxgiet riengz dangj byaij,
Cien fanh daih,
Bouxboux lai gyaez guek.

Vih guekgya giengzdaih,
Riengz dangj byaij,
Lwgminz lai fouqmiz,
Byacax hix aeu bae,
Mbouj aeu lau,
Haijfeiz hix gamj diuq.

Vih saedyienh aen moengh,
Cienz guek vunz,
Caezsim roengz goengfou,
Gak minzczuz beixnuengx,
Fanh daih aeu,
Doxhuz caeuq doxgiet.



Seizdoeng yinghvah hix hai ndaej hwngfwdfwd.

Vangz Yinz ingj

Siu Cuh goemq bak riuhihi, gij
yiengh de riu youq ndaw da Lungz
Byauh, caen ndeiawj, mbouj miz maz
beij ndaej hwnj.

“Menhmenh gwn! Yawj gij
yiengh mwngz gwn doxgaiq neix——”

“Gou lau mwngz dungx iek deq
gou nanz lai.”

“Gou mbouj iek.”

“Aen ceiz ndeigwn o.”

“Duh gou guh hane.”

“Gvaiq mbouj ndaej.”

“Lai gwn di, noix gangjvah.”

“Ndawranz mwngz miz geij boux
vunz?”

“4 boux.”

“Daxboh?”

“W.”

“Daxmeh?”

·Sawcuenhraz Lwgnyez·

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

“W.”
“Lij miz daegnuengx ndeu
dem?”

“Mwngz caen ngah dajdingq gij
sae hanz bouxwnq. Mbouj lwnh hawj
mwngz.”

“Sai le geijlai rengz bwh gij
haeux byaek neix ha!”

“Lij miz byalwg dem, daxboh gou
haemhlwenz daj ndaw dah dwk
hwnjdaej ne, daxmeh gou haetneix

ngamq cawj hawj gou hane.”

“Ndeigwn! Ndeigwn!”

“Ndeigwn couh gwn liux bae ba.”

“Ndei lo, hawj mwngz gwn!”

“Lij caengz gwn bae dingz ndeu,
caiq gwn di.”

“Imq lo.”

“Mbouj baenz, caiq gwn 10
gaemz.”

“Ndei ba!”

“Caiq gwn duz byalwg dem.”

“Yienghneix mwngz gwn maz
ne?”

“Ndaw ranz gou ngoenzngoenz
miz bya gwn.”

Lungz Byauh mbouj ndei caiq doi
lo, de youq ranz gwn mbouj roengz
haeux byaek, youq gwnz bya cix gwn
ndaej imq cungj mbouj roxnyinh, sam
gaemz song ndwnj, gijgwn ndaw
doengjfaex iq cij lw dingz ndwi lo.

(caengz sat)